

Ullut ataatsimiiffiusut aqqaneq arfersaneq pingajuat, tallimanngorneq 6. november 2009.

Immikkoortoq 35

**Meeqjanik kinguaassiutitigut atornerluinermut pinngitsaaliillunilu atoqatiginninnernut
atatillugu pineqaatissiissutit sukannernerulernissaat aammalu pineqaatissinnejarsimasut
pineqaatissinneqarnerminnut atatillugu katsorsarneqartalernissaat siunertaralugu
Naalakkersuisut Qallunaat Nunaanni Naalakkersuisunik isumaqatigiinniarnermik
aallartitsissasut Inatsisartunit peqquneqarnissaannik aalajangiiffigisassatut siunnersuut.**

(Inatsisartunut ilaasortaq Olga P. Berthelsen, Inuit Ataqatigiit)

(Siullermeerner)

Ataatsimiinnermik aqutsisoq: Josef Motzfeldt, Inatsisartut Siulittaasuat, Inuit Ataqatigiit

Josef Motzfeldt, Inatsisartut Siulittaasuat (IA)

Tassannga siunnersuuteqartuuvoq Inatsisartuni ilaasortaq Olga P. Berthelsen, Inuit Ataqatigiit.
Takanna.

Olga Poulsen Berthelsen (IA)

Qujanaq.

Pineqaatissiinerit pinerluttaalisitsineq pillugu inatsit tunngavigalugu pinerlunnerup qanoq ittuunera
tunngavigalugu pineqaatissiisoqartapoq, kiisalu qanoq iliuuseqarluni pineqaatissinneqarsimasoq
kingumut pinerluuteqannginnissaannik iliuuseqarfingeratigut.

Tamanna inuiatigiit Kalaallit tunngaviusumik eqqarsartariaasiannut naleqquttutut
isigineqarsinnaavoq. Pinerlunnerimmi assigiinngitsorpassuusarneri eqqarsaatigissagaanni, aammalu

pinerliisut assigiinngitsorpassuusarneri eqqarsaatigissagaanni, taamatut periuseqarneq paasinarsinnaavoq.

Ukiut kingullit arlalippassuit, Nunatsinni meeqqanik inuusuttuaqqanillu kinguaassiutitigut kanngutsaatsuliortarnerit amerliartuinnarput, minnerunngitsumillu sakkortussutsimikkut annertusiartuinnarlutik.

Pinerlunnerit qanoq ittuunerit aammalu inuiaqatigiinni pinaveersimatitsiniarnermik suliniuteqarnermik pingaartitsineq eqqarsaatigalugu, Inuit Ataqatigiinniit isumaqarpugut, kinguaassiutitigut kanngutsaatsuliortarnerit akiorniarneqarnissaannut sakkunik nutaanik eqqarsartariaqalersugut.

Kinguaassiutitigut innarliisartut katsorsarneqartannginnertik peqqutigalugu innarliisarnerat pillaanerinnaq atorlugu qaangerneqarsinnaangillat.

Taamaattumik inuiaqatigiinni – ilumut tamanna pingaartikkutsigu – kinguaassiutitigut innarliisartut katsorsarneqartarnissaat pingaartittariaqarpapput.

Ilisimaneqarpoq kinguaassiutitigut innarlerneqarsimasut, tarnikkut nanertugaanertik peqqutigalugu namminneerlutik innarliisartunngorsinnaanerat qanittuararsuusartoq. Siunissaq ungasinnerusoq eqqarsaatigalugu pinaveersaartitsinerlu iluatsissappat, Nunatsinni Naalakkersuinikkut qanoq iliuuseqartoqarnissaa pisariaqarluinnarpoq.

Pinerluttaalisitsineq pillugu inatsit, Qallunaat Nunaata ataaniippoq. Nunatsinni naalakkersuinermik suliallit toqqaannartumik inatsit taanna allanngortissinnaanngilaat. Taamaattumik Nunatsinni Naalakkersuisut ajornartorsiummut eqqartorneqartumut pinaveersaartitsiniarneq aammalu innarliisimasunik katsorsaasarneq angorusukkunikku Qallunaat Nunaanni Naalakkersuisunut saaffiginnittariaqarput.

Inuit Ataqatigiinniit ilisimavarput Nunatsinni partiit tamarmik ajornartorsiutip tamatumap qaangerniarneqarnissaanut suleqataaruskunneq oqariartuuteqartartut.

Taamaattumik neriuuteqarpugut siunissami Nunatsinni inuit toqqissisimasumik innarlerneqarsimanngitsumillu inuulernissaannut aqqutissat ilaat pingaaruteqartoq tapersorsoramaaraat. Taamaattoqanngippammi suli ukiorpassuit ajornartorsiut taamatut ittoq Nunatsinni atugaajuassammat.

Josef Motzfeldt, Inatsisartut Siulittaasuat (IA)

Qutsavigaarpus siunnersuuteqartoq inatsisartuni ilaasortaq Olga Poulsen Berthelsen, Inuit Ataqatigiit. Tassunga akissuttussaq Naalakkersuisuninngaannit, Naalakkersuisut Siulittaasuat.

Kuupik Kleist, Naalakkersuisut Siulittaasuat (IA)

Naalakkersuisut sinnerlugit siullermik siunnersuummik saqqumiussisoq qutsavigissavara, sammineqartumut ilungersunartumut iliuuseqarniarneranut. Tamanna tamatta akisussaaffigivarput, aamma iliuuseqarfisariaqarlugu.

Pineqaatissiissutit aalajangersaavigineqartarput pinerluttulerinermi inatsit naapertorlugu, eqqartuussiviillu aalajangigassaraat pinerluttulerinermi inatsimmi sinaakkusiussat aallaavigalugit pineqaatissiissut qanoq sakkortussuseqassanersoq.

Pineqaatissiissutit pinerluttulerinermi inatsisissaq nutaaq jannuarip aallaqqataani 2010-mi atulersussaq aallaavigalugu aalajangersaaffigineqartartussat, aalajangersaaffigineqartassapput. Pinerluuteqarsimasoq aallaavigalugu aammalu pinerluuteqarsimasup pinerluuteqaqqinnginnissaa anguniarlugu, pinaveersaartitsisinnaaneq aallaavigalugu pinerluuteqarsimasunut pineqaatissiissutaasartut sakkortussuseqarnissaannik politikkikkut kissaataasarsimasut naammassiniarlugit, eqqartuussiveqarneq pillugu ataatsimiititaliarsup kaammattuutigaa, pinerluttulerinermi inatsisissamik nutaami iliuuseqartoq aallaavigalugu aamma iliuuseq aallaavigalugu pineqaatissiisarnissaq inatsisiliuunneqassasoq.

Pinerluttulerinermi inatsisissami takuneqarsinnaavoq pineqaatissiissutit sakkortussusissaasa aalajangersaaffiginiarneranni pinerluutigineqarsimasup sakkortussusaa tunngaviginiarneqartassasoq. Tassunga ilanngullugit nalilersorneqartassapput pinerluutigineqarsimasup pinngitsoortinniarnissaanut, inuaqatigiit pingaartitsiginersut

pinerluuteqarsimasup inuttut atugarisai, tassunga ilanngullugit pineqartup inatsisinik unioqquitseqinnginnissaa siunertaralugu suut suliniutigineqartariaqarnersut.

Pinerluttulerinermi inatsisisap nutaap eqqartuusseriaatsit naapertorlugit suliarineqarsimanera erseqissaatiginiarlugu pineqaatissiissutit sakkortusiartuaartinneranni iluseq equnneqarsimavoq.

Iliuutsip taassuma atortussanngortinneqartup kingunerisaanik pinerluttulerinermi inatsimmi naasuiardeqarsimapput pineqaatissiissutit ataasiakkaat qaqgukkut atorneqartarsinnaanerat. Tamatuma kingunerisaanik eqqartuussisup pinerluuteqarsimasup pisariaqartitai aallaavigalugit pineqaatissiisinnaatitaanera attatiinnarneqassaaq. Kiisalu pineqaatisseeriaatsit ataasiakkaat atorneqarsinnaaneri pillugit maleruagassaliortoqassalluni.

Pinerluttulerinermi inatsimmut atuuttumut sanilliullugu, taanna sukaterineruvoq. Pineqaatissiissutit sakkortussusissaasa aalajangiiffigineqartarnerannut tunngatillugu Eqqartuussiveqarnermut Ataatsimiitaliarsuamit pingartinneqarluinnarsimavoq pineqaatissiissutit imarisaasa eqqarsaatigineqqissaarneqarnissaat. Pingaartumik inissiisarfinnut inissiisarnerit aammalu Nunatsinni inuaqatigiinni sullissisalernissap equnneqarnissaanut tunngatillugu.

Eqqartuusseriaatsit allanngortitsernerisa equnneqarneranut atatillugu suleqatigiissitanik arlalinnik pilersitsisoqarsimavoq.

Aaqqissuussinernerit nutaanut tunngatillugu kaammattuutinik suliaqarnissaat siunertaralugu soorlu inissiisarfinnut inissiisarnerit eqqarsaatigalugit. Tassunga ilanngullugit pinerliisut pisariaqartitaminnik katsorsarneqarsinnaanerinut periarfissat pitsanngortinnissaat. Suleqatigiissitap Nunatsinni inissiisarfinni katsorsaasarnernik isumaginnittarnernillu misissuisussap suliani 2009-mi aasakkut naammassivaa. Kinguaassiutitigut atornerluisarnermik suliaqartussatut suleqatigiissitap kaammattuutigaa inissiisarfinni ataatsimoirluni oqaloqatigiittarnerit atorneqalissasut.

Pissutsit Naalakkersuisunut isiginiaqqissaarneqartut. Naalakkersuisunit isiginiaqqissaarneqartut tassaapput kinguaassiutitigut atornerluisimasup nakorsaatit atorlugit katsorsarneqartarnerat, ilaatigut inissiisarfinnut inissinneqarnerinut atatillugu tissannaveersaatnik nakorsaaserneqartarnerat.

Tamannalu misiligummik iperagaanermik atatillugu aamma piumasaqaatitut atorneqartartoq. Annikitsuaraannarmillu ajorunnaarsaalluni katsorsaasoqartarluni.

Suleqatigiissitap kingulliullugu taaneqartup suliani naammassiniarlugit sulileruttorpoq. 2010-milu ukiuata affaani siullermi inissinneqarsimasut tarnip pissusaannik ilisimasalinnik, tassalu psykologinit psykiaterinillu katsorsarneqartarnerinut piumasaqaatinik pitsaassusaannullu tunngasunik ilaannakortumik inassuteqarnermigut suleqatigiissitap taassuma ilanngullugu suliarissavaa inissinneqarsimasunut sullisisarnermi maleruagassiorissaq.

Tassunga tullungatillugu ilisimatitsissutigineqarsinnaavoq suleqatigiissitap taassuma Nuummi matoqqasumik inissiisarfiliornissaq malinnaaffigimmagu. Inissiisarfik pineqartoq 2014-ip naanerani piareerluni atulernissaa naatsorsuutigineqararluni.

Siunnersummut saqqummiussisup pineqaatissinneqarsimasut pineqaatissinneqarnerminnut atatillugu katsorsarneqartalernissaannut kissaataata saniatigut Naalakkersuisut kissaatigaat aamma pinaveersaartitsinermut iliuutsit sakkortunerulernissaat.

Tamanna ajornartorsiut tamanut ilungersunartoq, peqqissaartumik politikkikkut suliarineqarnissaa qulakkeerniarlugu Naalakkersuisut pilersaarusrorpugut, Inatsisartunut ilaasortanut Naalakkersuisunullu ilaasortanut, atorfilinnullu tassunga attuumassuteqartunut upernaakkut ataatsimiinnissaq aappaagu sioqqullugu sammisaq pillugu isumasioqatigiissitsisoqassasoq.

Siuliani tunngavilersuutigineqartut tunngavigalugit aalajangiiffigisassatut siunnersuut Naalakkersuisunit tapersorsorparput aamma siunnersuut Inatsisinut Ataatsimiitaliami suliarineqarnissaa innersuupparput.

Josef Motzfeldt, Inatsisartut Siulittaasuat (IA)

Qujanaq, Naalakkersuisut Siulittaasuat. Partiini oqaaseqartut tullinnguupput tassalu siulliussooq Inatsisartunut ilaasortaq Kaali Olsen, Inuit Ataqatigiit.

Kaali Olsen (IA)

Ja, qujanaq.

Inatsisartut ukiakkut ataatsimiinneranni kinguaassiutitigut innarlerneqarsimasut katsorsarneqartalernissaannik siunnersuutit isumaqatigiiffiusumik akuersissutigineqarput. Ilutigitillugu Naalakkersuisut pineqartumut iliuusissanik sukumiisunik saqqummiussaqarput tamannalu Inuit Ataqatigiinnit suliami alloriarnertut pitsasutut isumalluarnartutullu isigaarput.

Kinguaassiutitigut innimiilliorerit eqqugaasunut misigisaapput inuunermut annertuumik sunniuteqarsinnaasut. Inuit Ataqatigiinnit eqqugaasut illersorneqarnissaat isumassorneqarnissaallu pingaarteqaarput isumaqarpugullu nukiit pigisagut annerpaat taakkua tapersersorneqarnissaannut katsorsartariallillu katsorsarnissaannut atortariaqarigut.

Kinguaassiutitigulli innarliisarnerit tamakkiisumik isiginnittaaseqarluni pitsaaliorlugillu akiorneqartariaqarput. Innarligaasimasunik tapersersuillunilu katsorsaasarnissat suliassat pingaarnersaraat, pinerlutsaaliinerilli minnerunngitsumillu pinerlussimasunik pinerloq-qitsaaliinerit suliassaapput manna tikillugu inuiaqatigiinni naammaginartumik naam-massineqarsimanngitsut.

Nunatsinni inoqarfiiit amerlanerit inukitsunnguupput angisoorsuunatillu. Taamaattumik pinerlineqarsimasup pinerlisiminik ulluinnarni naapitaqaratarsinnaanera periarfissaavoq pinerlineqarsimasumut toqqisisimamanngitsoq.

Naak taamatut pisoqaratarsinnaanera immaqa pinngitsoortivinneqarsinnaangikkaluartoq piviusuovoq kinguaassiutitigut innarliisimasut – pineqaatissinneqarsimagunik pineqaatissinneqarsimanngikkunilluunniit - naammaginartumik katsorsarneqartannginnerat. Tamanna toqqisisimamanngilaq piaartumillu iliuuseqarfingeqartariaqarluni.

Siunnersuuteqartup meeqqanik kinguaassiutitigut atornerluinermut pinngitsaaliillunilu atoqatiginninnernut pineqaatissiissutigineqartartut sukannerulerlernissaat siunnersuutigaa.

Siunnersuut Inuit Ataqatigiinnit ima paasivarput sukannerulerlensinerup malitsigissagaa pinerliisimasut pinngitsooratik pineqaatissinneqarnerminnut atatillugu pilersaarusror-luakkamik pinerloqqinnginnissaat anguniarlugu iliuuseqarfingeqartalissasut katsorsar-neqartalissasullu.

Nalinginnaasumik oqartoqartarpoq meeqqanik kajungerisaqartartut pædofilnik, taaneqartartut katsorsaruminaatsorujussuusut. Ilisimassalluguli pingaartuuvoq innarliisartut tamarmik pædofiliounngimmata.

Innarliisartut arlaqartut assigiinngitsunik peqquteqarlutik killiliinissartik ajornakusoortittarpaat meeqqanillu atornerluisarlutik. Meeraanermili ineriarternermilu assigiinngitsutigut atugarliorsimaneq peqqutigalugu killissanik malinnissinnaanngitsut imaluunniit paasinnissinnaangitsut katsorsaariaatsit perorsaariaatsillu assigiinngitsut atorlugit katsorsarneqarsinnaasut maani nunanilu allani misilittakkat takutippaat.

Naak Nunatsinni kinguaassiutigut innarliisartut qanoq agguataarsimanersut ilisiman-ngikkaluarlugu qularutiginngilarput pitsaliuineq siunertaralugu innarliisartunik suli sukumiinerusumik katsorsaasalernissaq isumatusaarnerussasoq.

Taamaammat pinerliisimasut pineqaatissinneqarnerminnut atatillugu pinngitsooratik katsorsarneqarnissamut neqoroorfingineqartalernissaat Inuit Ataqatigiinniit iliuusissatut pisariaqarluinnartutut isigaarput siunnersuuteqartullu Naalakkersuisut Danskit Naalak-kersuisunut pineqartoq pillugu isumaqatigiinnialernissamut peqquneqarnissaannik siunnersuutaa ilalerlugu.

Siunnersuummi pineqarput inuit pineqaatissinneqarsimasut. Inuit Ataqatigiinniit aamma pingaartipparput inuit meeqqanik kinguaassiutigut kajungerisaqartut suli piner-lussimanngikkaluartut aamma ikiorneqartariaqartut suliniummilu ilanngullugit eqqarsaa-tigineqartariaqartut.

Inuit Ataqatigiinniit ilisimalluarparput kinguaassiutigut atornerluisimaneq pissutigalugu pineqaatissinneqarsimasunik katsorsaasarnissamik siunniussaq pilersaarusrionernik nukinnillu annertuunik pisariaqartitsissasooq.

Katsorsaasarneq aallartissappat katsorsaariaatsinik Nunatsinnut atuisussanullu tulluussakkanik inerisaasoqartariaqassaaq tamannalu aatsaat pisinnaassaaq sulisussanik naleqqtunik ilinniagalinnik piginnaasalinnillu peqarnikkut.

Naalakkersuisut siunnersuummut akuersaarnerat assut iluarisimaarpapput upernaarulu isumasioqatigiissitsilersaarnerat nuannaarutigalugu. Suliassaq annertummat Danskit Naalakkersuisuinut isumaqtiginninniarnissaq maannangaaq aallartisarneqalissasoq innersuutigissavarput.

Taamatullu oqaaseqarluta Inuit Ataqatigiinniit nalunaarutigissavarput siunnersuut tunngaviatigut ilaleratsigu.

Josef Motzfeldt, Inatsisartut Siulittaasuat (IA)

Qujanaq, Inatsisartunut ilaasortaq Kaali Olsen, Inuit Ataqatigiit, qutsavigaatsigit.

Oqaaseqartunut ingerlaqqippugut. Siumuminngaaniit oqaaseqartussaq Inatsisartunut ilaasortaq Jens Immanuelsen.

Jens Immanuelsen (S)

Meeqyanik kinguaassiuutitigut atornerluinermut pinngitsaaliillunilu atoqatiginninnernut atatillugu pineqaatissiissutit sukannerulerlernissaat aammalu pineqaatissinneqarsimasut pineqaatissinneqarnerminnut atatillugu katsorsarneqartalernissaat siunertalaralugu Naalakkersuisut Qallunaat Nunaanni Naalakkersuisunik isumaqtiginniarnermik aallartitsissasut Inatsisartunit peqquneqarnissaannik aalajangiiffigisassatut siunnersuut.

Inatsisartunut ilaasortap Olga P. Berthelsen, Inuit Ataqatigiit saqqummiussaani pineqartut tamarmik Nunatsinni eqqartuussiveqarneq pillugu isumalioqatigiissitarsuup suliaanut atatillugu ilanngullugit suliarineqarmata siunnersuut taamatut iluseqartillugu akuersaanngilarput.

Siumumiillu uggorartipparput siunnersuut apeqquteqaat aallaavigalugu oqallisissiatut ingerlanneqarsimanngimmat.

Josef Motzfeldt, Inatsisartut Siulittaasuat (IA)

Qujanaq.

Oqaaseqarumasoq siulleq Inatsisartuni ilaasortaq Olga Poulsen Berthelsen, Inuit Ataqatigiit.

Olga Poulsen Berthelsen (IA)

Qujanaq.

Tassa Siumup siunnersuummut uunga itigartitsinerminut tunngavilersuutigisaa, tassalu Nunatsinni eqqartuussiveqarneq pillugu isumalioqatigiissitaasup sulianut atatillugu ilanngullugu suliarineqarmata.

Apeqquutigissavara uani taamatut oqarnissinni, suunukua siunnersuummut tunngassuteqartut isumalioqatigiissitarsuup suliarisimammagit siunnersuut itigartikkissi?

Aammalu apeqqutigissavara oqallisisssiatut, apeqquteqaat aallaavigalugu oqallisisssiatut siunnersuut saqqummiussimagaluarukku qanoq isummersorfigisimassagaluarpsiuk?

Josef Motzfeldt, Inatsisartut Siulittaasuat (IA)

Oqaaseqartoq.

Jens Immanuelsen (S)

Qujanaq. Siullermik siunnersuutip qulequtaa aallaavigalugu ukiut qulit Nunatsinni eqqartuussiveqarnermi Kalaallit Nunaanni eqqartuussiveqarneq pillugu isumalioqatigiissitaq suliaqarnikuovoq, isumalioqatigiissitallu suliaat maannakkut inaarsarlutik suliarineqartut, aamma Nunatsinni.

Naalakkersuisut akissuteqaamminni oqariartornerattut jannuarip aallaqqaataaninngaanniit kinguneqartinniarneqartussaapput, taamaattumik siunnersuummi kinguaassiutitigut meeqqanik atornerluisartut, atornerluisartullu allat pineqaatissinneqartarnerat aammalu taakkua katsorsarneqartarnerat, siunissami sukannererusumik aqutissiuunneqartassasut isumalioqatigiissitap isumaliutissiissutaani erseqqissumik piumasarineqarpoq.

Taannaavoq suliassaq, taannalu tunngavigelugu oqarpugut siunnersuut apeqquteqaat aallaavigalugu oqallisisssiatut ingerlanneqarsimanngimmat uggorigippu.

Ukiuni qaangiuttuni oqareernittut qulini Kalaallit Nunaanni eqqartuussiveqarneq pillugu isumalioqatigiissitap suliai annertoorujorujussuarmik Inatsisartuni suliarineqartarput, immaqa erseqqinnerusumik oqaatigalugu 2056-inik qupperneqartoq 2009-ip ingerlanerani

naammassineqarpoq, taassumalu iluaniippu aamma periutsit assigiinngitsut atorlugit pineqaatissinneqarsimasunik katsorsaasarnermik suliaqarsinnaaneq aqqutissiuisinnaanerit.

Taamaattumik qulequtaa siunnersuutip aallaavigalugu, tassa Danmarkimi Naalakkersuisut isumaqtiginiarneqalissasut, taamatut isummerpugut.

Josef Motzfeldt, Inatsisartut Siulittaasuut (IA)

Inatsisartunut ilaasortaq Kaali Olsen, Inuit Ataqatigiit.

Kaali Olsen (IA)

Tassa uani siunnersuummi siunertarineqarpoq, apeqqutaavallaarunangilaq suna inatsit tunngavigalugu taakkua pineqaatissinneqarsimasut, kisianni pineqaatissinneqarsimanermik nalaani katsorsarneqartalissasut, kingumut taamatut ilioqinqinniassammata.

Maannakkut ilisimavarput katsorsaasarneq annikitsuararsuusoq, taamaammat siunertaa imatut uanga paasivara taakkua taamatut iliorsimasut katsorsarneqartalissasut. Taanna isuma qanoq isumaqarfagaasiuk? Taanna uani siunnersuummi siunertaammat. Ajorpa katsorsarneqartalernissaat?

Josef Motzfeldt, Inatsisartut Siulittaasuut (IA)

Oqaaseqartoq.

Jens Immanuelsen (S)

Pinerluttulerinermut inatsimmi unioqqutitsinermi Nunatsinni pineqaatissiineq atuuppoq. pineqaatissiinerup nammineq isumarivaa aamma pineqaatissinneqarsimasut inuiaqatigiinnut uteqqinnissaat sulissutigineqassasoq, tassa pineqaatissiinerup isumaa Nunatsinni atuuttoq.

Taanna tunngavigalugu aamma Naalakkersuisut akissuteqaamminni oqariartuutigaat immikkut tarnip pissusaannik ilisimasallit tassani suliaqarnissaannik periarfissaq siunissami qanittumi ornikkigut, aamma maani 2014-imi matoqqasumik pineqaatissinneqarsimasunik inissiisarnissaq eqqarsaatigalugu.

Imaappoq, suliassat aallartereeput, aamma eqqartuussiveqarneq pillugu ataatsimiititaliarsup suliaani Nunatsinni peqataaffigineqarsimasumi.

Taamaattumik pineqaatissiinerup nammineq isumagereerpa pineqaatissinneqarsimasut inuiaqatigiinnut uteqqinnissaat aamma sulissutigineqassasut katsorsaanerit ilaalu ilanngullugit aqqutigalugit.

Josef Motzfeldt, Inatsisartut Siulittaasuat (IA)

Isumaginninnermut Naalakkersuisoq.

Maliina Abelsen, Isumaginninnermut Naalakkersuisoq (IA)

Tusarusukkaluarpara siunnersuuteqartuimmut eqqartuussisarnermi pineqaatissiisarnermut Siumut qanoq isumaqarnersoq, tusarusukkaluarpara Siumut qanoq isumaqarnersoq.

Tassa katsorsasarnermut pineqaatissiisimanermut tunngatillugu aammalu isertitsivimmitsisarnermut meeqqanut atornerluinermut, qanoq siunnersuummut tunngatillugu qanoq ilissi inissismavisi?

Josef Motzfeldt, Inatsisartut Siulittaasuat (IA)

Oqaaseqartoq.

Jens Immanuelsen (S)

Qujanaq. Pineqaatissiineremi pingitsoorani aamma katsorsaanissaq pisariaqarpoq, taanna assortuussutigineqarsinnaanngilaq. Pineqaatissiinerup isumagaa pineqaatissinneqarsimasut aamma inuiaqatigiinnut uteqqinnissaannut katsorsarneqassammata.

Aamma pingaartinneqarpoq taanna ukiorpanngortuni Kalaallit Nunaanni eqqartuussiveqarneq pillugu isumaliutissiissutip imaa tamaat qiviaraanni. Suliassaavoq suliarlu taanna aallartisarneqareersimalluni.

Josef Motzfeldt, Inatsisartut Siulittaasuat (IA)

Inatsisartunut ilaasortaq Kaali Olsen, Inuit Ataqatigiit.

Kaali Olsen (IA)

Kinguaassiuutitigut atornerluisartut ajoraluartumik imaakkajuttarpoq ataaseriaannaratik arlaleriaqalutillu taamaaliortartut, tassa misilitakkagut tusagassiuutinilu atuarnikuusagut tassa taamatut takutitsipput, allaat meerarpassuit inummit ataatsimit kinguaassiuutitigut atornerlunneqartarsimapput, uumalu siunnersuuteqartup, siunnersuutip siunertaraa katsorsaasarneq maannakkut pisanngitsoq, maannakkut pisanngimmat naammaginartumik, utaqqvivallaarnagu maannakkut Naalakkersuisut piumaffigineqassallutik aallartisaqqullugu isumaqatigiinniassasut. Ajorpa taanna isuma? Ajormanuna taanna?

Uanga paasiuminaatsikkakku, isuma taanna ajorami suliassap tuavisaarnissaa?

Ajornartorsiutaammat annertooq, taanna isuma ajorami?

Josef Motzfeldt, Inatsisartut Siulittaasuat (IA)

Oqaaseqartoq.

Jens Immanuelsen (S)

Soorlu Naalakkersuisut akissuteqaataanni oqaatigineqareersoq, pineqaatissiisarneq Nunatsinni isumalioqatigiissitap ukiorpanngortuni suliarisai tunngavigalugit inassuteqaataalu, sukannererusumik aamma katsorsaasarneq eqqarsaatigalugu, pineqaatissiinermi aqqutissiuunneqartussaapput, taannalu jannuaarip aallaqqataaninngaaniit atuutilersinneqartussaavoq.

Taamaattumik pineqaatissinneqarsimasut sukannererusumik pineqarsinnaanerannut apeqquut eqqartuussisut suliaasa qanoq inerneqarnerinik aallaaveqartillugu suliarineqarnissaat taanna assortuussutigisinnaanngilarput.

Aamma pisariaqarpoq, pineqaatissiinerup nammineq siunertarimmagu, oqareernittut pineqaatissinneqarsimasut pinerluut qanoq ittuunera apeqquaatinngagu inuiaqatigiinnut uteqqinnissaat sulissutigineqassasoq. Taanna isumaqarpoq aamma pisariaqarpat katsorsaaneq aamma sulissutigineqassasoq.

Josef Motzfeldt, Inatsisartut Siulittaasuat (IA)

Inatsisartunut ilaasortaq Kaali Olsen, Inuit Ataqatigiit.

Kaali Olsen (IA)

Naggataamik aperissaanga. Tassa maannakkut katsorsaasarneq amigartorujorujussuuvoq, taannalu aallartisassappat suliassat annertoorujussuullutik, katsorsaariaatsinik inerisaasoqartariaqarluni.

Tunngaviatigut una isuma katsorsaasarneq massakkut pilersinniarneqarnera, tassa akerlerigassiuk naaggaarparsi unaaat?

Josef Motzfeldt, Inatsisartut Siulittaasuat (IA)

Oqaaseqartoq.

Jens Immanuelsen (S)

Qujanaq. Oqaatigeriikkattut ukiorpanngortuni eqqartuussiveqarneq pillugu ataatsimiititaliarsuarmi taakkua sukaterneqarnissaat ilanngullugu sulissutaareersimavoq, suliassarlu taanna maanna pineqaatissiisarneq eqqarsaatigalugu jannuaarip aallaqqaataaninngaaniit sukateriffingineqarpoq, suliassaq taanna ingerlavoq.

Oqareernittut uteqqiinnassavara, pinerluutip qanoq innera apeqqutaatillugu pineqaatissiisoqartarpoq, pineqaatissiinermilu aamma pineqaatissinneqartoq inuiaqatigiinnut uteqqinnissaanut katsorsarneqartussaavoq.

Josef Motzfeldt, Inatsisartut Siulittaasuat (IA)

Inatsisartuni ilaasortaq Justus Hansen, Demokraatit.

Justus Hansen (D)

Qujanaq. Qanorooq pinngitsaaliisimanermut tunngatillugu saqqummiussaa, ukiuni pingasuni qaammatini arfineq-pingasunilu pineqaatissinneqarpoq taanna, qaammatit arfineq-pingasut qaangiutiinnartut anigami taanna pinerluttoq, tassa pinerlisani qaammatit arfineq-pingasut qaangiutiinnartut aqqusinermi naapippaa, tassa ukiunik pingasunik suli siusinnerusumik pineqaatissinneqarsimannilaq.

Siumut qanoq isumaqarpa, tamanna sakkukippallaamik pineqaatissiarermik tunngaveqarpa?

Josef Motzfeldt, Inatsisartut Siulittaasuat (IA)

Oqaaseqartoq.

Jens Immanuelsen (S)

Qujanaq. Mikinerpaamilluunniit assortuussutiginngilarput pineqaatissiinermi pineqaatissinneqartup pineqaatissinneqarnermini tunngaviusut aallaavigalugit qanoq aalajangiiffigineqarnera eqqartuussivimmi, taanna mikinerpaamilluunniit assortuussutigisinnaanngilarput.

Pisariaqartipparput taanna, amigaataasorlu aana, inuiaqatigiinnut uterteqqinnissaanut katsorsaaneq naammattumik sulissutigineqarneq ajormat.

Taanna siunnersuutip qulequtaa aallaavigalugu Naalakkersuisut saqqummiussaanni pineqaatissinneqarsimasut eqqarsaatigalugit immikkut ilisimasalinnit katsorsaanerit aallartinneqartarnissaat siuliani oqarnittuut Kalaallit Nunaanni eqqaartuussiveqarneq pillugu isumaliutissiissummi ilanngulluni suliaareerpoq.

Taamaammanuna oqartugut, tunngavimmigut sumilluunniit pineqaatissiarermut tunngatillugu siunnersuut aammalu uagut oqariartuuterput assortuitinngillat, kisianni suliassaq ingerlareermat taamatut isummerpugut.

Josef Motzfeldt, Inatsisartut Siulittaasuat (IA)

Inatsisartuni ilaasortaq Kristian Jeremiassen, Siumut.

Kristian Jeremiassen (S)

Siulittaasoq qujanaq. Tassa oqluuserisarput imaattoq ilungersunartorujussuuvoq, aamma soorunami pinaveersaartinniarlugu aqqutissat suut tamaasa atorlugit ingerlasariaqarpugut.

Naalakkersuisut Siulittaasuata saqqumiussissaani tassa maluginiarpaa siunnersuutigineqartup qulequtaa tunngaviilu tamakkerlutik Naalakkersuisut taakkua suliniuteqarfigigaat, aamma piviusunngortissallugu ilungersuuteqartut.

Taamaattumik Siumuminngaaniit una siunnersuut Naalakkersuisut taamatut siunertaqarnerat aammalu suliniarnerat ataqqillugu aamma upperalugu taamatut siunnersuut naaggaarpapput.

Isumaqarpunga suliat qaleriilerpata aamma torinngitsumik ingerlalernissai taanna pinaveersimatinneqartariaqartoq. Taamaattumik suliat ingerlareersimanerat taamatut aalajangerneq isumaqarpunga tupinnartuliaanngitsoq.

Aamma akuerineqarsinnaanngilaq meeqqanik kinguaassiutitigut atornerluineq aamma pinngitsaaliilluni atoqatiginninneq.

Aamma ilumoornoq ukua atornerluisut tassa kinguaassiutitigut aammalu pinngitsaaliilluni atornerluisut taakkua katsorsarneqartariaqarmata ikiorneqartariaqarlutillu.

Isumaqarpunga ersarissumik Naalakkersuisut taamatut tikkuussinerat ersarereermat paasinartoq taamatut isummernerput.

Uanimi oqaluuserisat siulii qiviarutsigit Naalakkersuisut oqaatigisarpaat ilaatigut suliassaq ingerlareersut, suliassarlu itigartillugu. Suliaq uani allaanerunngilaq, upperaarpot Naalakkersuisut taamatut suliniuteqarnerat aamma piviusunngortinneqarnialerpoq, nuannerpoq aamma piviusunngussaaq.

Isumaqarpunga assortuussuteqanngitsugut uani suliami, suliallu qanoq ingerlanera tassani apeqqutaaginnartoq. Qujanaq.

Josef Motzfeldt, Inatsisartut Siulittaasuut (IA)
Inatsisartuni ilaasortaq Andreas Uldum, Demokraatit.

Andreas Uldum (D)

Aallaqqaammut sulianut allanut assersuutissallugu uanga isumaqataanngilanga tassani.

Kisianni uanga paaserusuppara apeqqut marloriarluni apeqqutigineqareerunalaruarpoq, kisianni aappimik naamimik akisassamik aperissuakkit.

Piaarnerpaamik atuutsilernissaa sulissutiginiarlugu siunertaq isumaqtigaasiuk?

Aappi naamiluunniit.

Josef Motzfeldt, Inatsisartut Siulittaasuat (IA)

Oqaaseqartoq.

Jens Immanuelsen (S)

Pineqaatissiisarnerit jannuaarip aallaqqaataaninngaaniit sukannernerulertussaapput, isumalioqatigiissitap suliai aallaavigalugit. Suliassaq taanna innersuussaareerpoq, taamaattumik assortuussuteqanngilagut mikinerpaamilluunniit tassani.

Josef Motzfeldt, Inatsisartut Siulittaasuat (IA)

Qujanaq. Oqaluuserisassap taamatut inissinneqarsimaneranut eqqaasitsissutigiinnassavara Siulittaasoqarfimmi ukiakkut ataatsimiinnissap piareersarnerani taamatut inissiineq aamma Inatsisartuni Inatsisartut ataatsimiinnerat aallartimmat tamanit akuersissutigineqareersimammat, taamaattumik taamatut akuersarsimaneq inimi najuuttuni tamanit partiinit tamanit isumaqtigineqarmat, taamatut inissinneqarsimavoq.

Qutsavigaarput Siumup oqaaseqartua Inatsisartunut ilaasortaq Jens Immanuelsen.

Partiit oqaaseqartuini tulliuttoq, Demokraatit oqaaseqartuat Inatsisartuni ilaasortaq Justus Hansen.

Justus Hansen (D)

Erseqqissaatigilaassavara aallaqqaammut kalaallisullu qallunaatullu assigiippianganngimmata, kalaallisuuani amigaateqalaarpoq, kisianni tassa isumaa ilaavoq kalaallisuuani.

Demokraatini sunnersuut manna iluaraarput, ukiut arlallit ingerlanerini anguniarsimasatsinnut tulluummat. Isertunngilarput, Demokraatini isumaqaratta, inuit inoqatiminnt ulorianartorsiortitsisut saamavallaamik pineqaatissinneqartartut – minnerunngitsumik meeqqat kinguaassiutitigut atornerlunneqarsimatillugit.

Demokraatini ataasiarata akerlilersorneqartarpugut – maani Inatsisartuni aammali tusagassiutini – partiinit allanit, siunnersuuteqaraangatta sakkortunerusumik pineqaatissiisalernissarput pillugu. Tamanna tunngavigalugu nuannaarutigaarput, manna siunnersuut partiimit allamit siunnersuutigineqarmat, isumaqaratta neriuutigalugulu, siunnersuutip amerlanerusunit ilalerneqarneqarnissaa ilimanarnerussasoq.

Taamaattumik siunnersuuteqartoq isumaqatigaarput oqarmat, Naalakkersuisut danskit naalakkersuisuinik isumaqatiginninniarlutik aallartissasut anguniarlugu pineqaatissiisarnerit sakkortusineqarnissaat. Peqataanik folketingimi ilaasortaatitagut marluk, Juliane Henningsen aamma Lars Emil Johansen kaammattorusuppagut nammineerlutik suleqatiminnt matumani pineqartoq saqqummiutissagaat aamma aqqt tamanna atorlugu Danmarki tatisinnaaniassagatsigu meeqqanik kinguaassiutitigut atornerluisartut sakkortunerusumik pineqaatissinneqartalernissaannik kissaaterput piviusunngortinniarlugu.

Demokraatini aamma pingaartippalput erseqqissassallugu, pissaanerup pingasunngorlugu avinneqarsimanera angisuumik ataqqigatsigu. Politikeritut akuliuffigissanngilarput eqqartuussiviiit qanoq pineqaatissiisassanersut – taamaallaat suliassaraarput eqqartuussivinni atorluarneqarsinnaasunik inatsisitigut sinaakkusiinissaq. Pineqaatissiisarermili killiusut ullumimut naleqqiullugu sakkortunerusariaqarput, inoqatinik ulorianartorsiortitsisimasunut ilanngullugit meeqqanik qanorluunniit atornerluisimasut.

Demokraatini siunnersuuteqartoq aamma tapersorsorusupparput oqarmat aalajangersimanerusumik pinerluttaalisitseriaatsinik atuinerusariaqartugut tassunga ilanngullugu katsorsaarnerit, taamaaliornikkut mattussivimmiittarnerup perorsarsimasutut inooqataalernissamut aqqtissiuinissaa pitsaanerulerniassammat.

Taamatut oqarluta siunnersuutip akuerineqarnissaa inassutigaarput.

Josef Motzfeldt, Inatsisartut Siulittaasuat (IA)

Qujanaq Demokraatit oqaaseqartuaq Inatsisartunut ilaasortaq Justus Hansen, qutsavigaatsigit.

Utoqqatserpunga, Inatsisartunut ilaasortaq Kim Kielsen, Siumut.

Kim Kielsen (S)

Uani Demokraatininngaaneersup oqariartuutai ilisarnarput assigiinngitsut saqqummiinerminni, siorna Inatsisartuusimasut aamma oqariartutinut assingusupilussuupput. Taamaattorli erseqqissarusuppara Inatsisartunut ilaasortamut Jens B. Frederiksen taamanikkut Inatsisartuusoq, siunnersuutaa ilalerneqarsimavoq, kisianni aappassaanneerneqanngitsoorluni, tassa imaappoq kivivoq. Tassa aallaqqataanniit nutaamik kaammattorusuppakkit nutaamik siunnersuuteqarsinnaassasutit. Qujanaq.

Josef Motzfeldt, Inatsisartut Siulittaasuat (IA)

Oqaaseqartoq.

Justus Hansen (D)

Aap qujanaq. Taava aamma soorlu oqaatigigiga, soorunami aamma taamaaliorusuppunga, taava apererusupparput Naalakkersuisut siunnersuutip taassumap suliareqqinnejarnissaa inassutigisimaneraat.

Josef Motzfeldt, Inatsisartut Siulittaasuat (IA)

Qujanaq Justus Hansen Demokraatit.

Partiit oqaaseqartuini tulliuppoq Atassutip oqaaseqartua Inatsisartuni ilaasortaq Siverth K. Heilmann.

Siverth K. Heilmann (A)

Inuit Ataqatigiit sinnerlugit Inatsisartuni ilaasortap Olga P. Berthelsenip siunnersuutaa soqutiginartoq pisariaqartorlu Atassummiit imaattumik oqaaseqarfingissavarput.

Atassummit eqqoriaruminaatsipparput kinguaassiutitigut meeqqanut kanngutsaatsuliortartut amerliartornersut imaluunniit eqqumaffiginninnerulerup kingunerisaanik paasineqartartut amerliartornersut, tamannali uniffiginagu siunnersuuteqartoq isumaqatigilluinnarparput inuiaqatigiit ikissutsinnut sanilliullugu amerlavallaarujuussuartut iliuuseqarfingineqartariaqartullu.

Kinguaassiutitigut atornerliusartut aammalu pinngitsaaliillutik atoqateqartartut ikilisarneqarnissaat siunertalarugu matumani iliuusissanik arlalinnik sulissutiginnittoqassasoq siunnersuuteqartoq tikkuaavoq.

Siullermik piumasarineqarpoq pineqartunut pineqaatissiisarneq sukannererulersinneqassasoq, tamannalu Atassummit tamakkiisumik tapersersorparput.

Aappassaattut piumasarineqarpoq pineqartut pineqaatissinneqaraangamik isertitsivinniitinneqaratik aamma katsorsorsarneqartalissasut, tamannalu aamma Atassummit tamakkiisumik taperserparput.

Pingajuattut siunnersuutip qallunaatuata qulequataa naapertorlugu taamatut pinerluttulerinermut inatsimmik unioqqutitsisarneq pinaveersimatinniarlugu suliniuteqartoqassasoq piumasarineqarpoq, tamanna aamma Atassummit tamakkiisumik taperserparput.

Siunnersuummi soorlu ersersinneqartoq, siunnersuut manna akuersissutigineqarpat Naalagaaffik isumaqatigiinniarfigineqassaaq tamatumalu saniatigut Nunatsinni nammineq sulissutigisassaqarpugut kinguarsarneqartariaqanngitsumik.

Pinaveersaartsinermut aammalu katsorsaasoqartalernissaannut aningaasartutuissat Nunatta Karsianit akilerneqartussat pillugit missingersuusiamik Inatsisartut Aningaasaqarnermut Ataatsimiitaliaanut aammalu Inatsisartut ataatsimiitaliaanut attuumassuteqartunut Naalakkersuisut saqqummiussinissaat aalajangiunneqassasoq Atassummit matumani kaammattuutigissavarput.

Taamatut naatsumik oqaaseqarluta Atassummit inassutigissavarput siunnersuut akuersaartumik suliarineqassasoq aappassaaneerneqartinnagulu Inatsisartut Inatsisit Atortinneqarnerannut ataatsimiitaliaanut suliassanngortiunneqassasoq.

Josef Motzfeldt, Inatsisartut Siulittaasuat (IA)

Qujanaq. Qutsavigaarput Atassutip oqaaseqartua Siverth K. Heilmann.

Inimit oqaaseqartoqarumanngilaq naammagisimagamitsit.

Partiit oqaaseqartuini kingullertut oqaaseqassaaq Kattusseqatigiit Partiata oqaaseqartua
Inatsisartunut ilaasortaq Jakob Skade.

Jakob Skade (KP)

Qujanaq.

Inatsisartunut ilaasortap Olga P. Berthelsen-ip siunnersuutaa Kattusseqatigiit Partiianii
paasilluarlugu taperserlugulu imaattumik oqaaseqarfingissavarput.

Soorlu tamanit ilisimaneqartoq Inatsisartut ukiut kingulliit 15-it iluanni, inatsisartut inimi maani
eqqartuussiveqarneq pillugu ataatsimiitaliarsuup sulinera malinnaaffingineqarsimavoq aamma
taassuma isumaliutissiissutaa aamma maani inimi taanna suliarineqarsimavoq.

Suliarujussuup taassuma ingerlanneqarnerani aamma Kattusseqatigiit Partiata piumasaqaataannut
ilaasарput, inuit meeqqanik kinguaassiutitigut atornerluisartut pineqaatissinneqartarnerannut
tunngasut.

Tassa Kattusseqatigiit Partiiani isumaqaratta inuit taamannak meeqqanut kusanaatsigisumik
ajortigisumillu kinguaassiutitigut innarliisartut akuersarneqarsinnaanngitsumik iluuseqartarnerat
sapinngisaq tamaat pinngitsoortinniarneqartarnissaat tamatta akisussaaffingisariaqaripput,
taamaammat meeqqat katsorsarneqarnerisa saniatigut aamma inuit pinerluttuliorsimasut
katsorsarneqartarnissaat pisariaqartoq Kattusseqatigiit Partiianiit isumaqarpugut.

Tassa siunnersuuteqartup eqqortumik oqarneratuut, kinguaassiutitngut innarlerneqarsimasut aamma
namminneq kinguaassiutitigut atornerluisunngorsinnaanerat qanittuararsuuisinnaasarmat.

Taamaattumik ajornartorsiutip sabinngisamik pinaveersimatinneqarnissaa aammalu meeqqanik kinguaassiutitigut innarliisarnerup taamaativinneqarnissaa anguniarlugu Naalakkersuisumut suliassaqartumut akisussaasumut piaartumik saaffinginnissutingineqartariaqartut Kattusseqatigiit Partiianiit piumasaraarput.

Tassami nalunngilarput pinerluttulerinermut inatsit nutartigaq 1. januar 2010-mi atuutilertussaavoq, isumaqarpugut tamanna iluatsillugu Naalakkersuisut danskit Naalakkersuisuinut suliassaq pingaaruteqartoq piaartumik saaffiginnissutigisariaqaraat.

Taamatut oqaaseqarlunga suliap aappassaaneerneqannginnerani ataatsimiitaliami susassaqartumi sukumiisumik oqaluuserineqarnissaa inassutigaara.

Josef Motzfeldt, Inatsisartut Siulittaasuat (IA)

Qutsavigaarput Kattusseqatigiit Partiata oqaaseqartua inatsisartuni ilaasortaq Jakob Skade.

Inimiit oqaaseqartoqarnianngimmat siunnersuuteqartoq Inatsisartuni ilaasortaq Olga Poulsen Berthelsen, Inuit Ataqatigiit.

Olga Poulsen Berthelsen (IA)

Qujanaq.

Oqaaserpassuit atussanngilakka kisianni qutsavigerusuppara, qujarusuppunga Inatsisartuni amerlanerussuteqarluartut siunnersuut tapersersormassuk aammalu minnerunngitsumik qujarusuppunga Naalakkersuisut siunnersummut paasinnilluarlutik suleriaqqinnissaminut aqqutissiuiniarmata.

Inuit Ataqatigiit oqaaseqartuata oqaaserisai tamakkiisumik soorunami taperserpakka aammalu nuannaarutigisorujussuullugu taamatut ersaritsigisumik siunnersummut isummersormata.

Soorunami Siumumut pakatsilaanngitsuunngilanga, pissutigalugu ukiut kingulliit oqallittarnerit naapertussagutsigit taamaattumik siunnersummut siunertaqartumut tapersersuisutut isigisarsimanikuugaluarakkit, kisianni naluara paatsuuinermik taanna tunngaveqarnersoq, tassami

siunnersutip namminermi imminik kisimi siunertarinngilaa pinerluttusimasoq parnaarunniaannarlugu pineqaatissinneqassasoq, kisianniuna pineqaatissinneqarnermini sivitsornerata nalaani qanoq ikiorsinneqarnissaat katsorsarneqarnissaat taanna siunertaasoq.

Nuannaarutigisanni uani Naalakkersuisut akissutaat eqqarsaatigissagaanni isumaqarpunga periarfissinneqartugut taakkua apeqquit qulaajassallugit, tassa pineqaatissinneqartoq sivitsuiffigineqarnermi nalaani ilumut parnaarussivimmiittariaqvinnersoq aamma tamakkua apeqquit eqqartorsinnaajumaaratsigit Naalakkersuisut upernaamut inatsisartut peqatigalugit isumasioqatigiinnissaanik, taamaalilluni immaqa ernummassutigineqarsinnaasoq ilaatigut ernummassutigineqartartoq ilumut pissusissamisoornersoq inuit parnaarutiinnarlugit sivitsuiinnarnikkut pinerluttarnerat millisarneqartarnersoq, taanna soorunami eqqartorneqarsinnaavoq.

Kisianni uanga isumaqarpunga Eqqartuussiveqarnermut Ataatsimiitsitaliarsuup siunertaa tassalu iliuuseqartoq aallaavigalugu aammalu iliuuseq aallaavigalugu pineqaatissiisarnissaq eqqarsaatigissagaanni iliuuserineqartartoq uani eqqartugarput sakkortuujummat taava aamma pineqaatissiiffigineqarnera sakkortuusariaqartoq.

Inuk taamatut meeraq inuusuttuarluunnit imaluunniimmik aamma inersimasoq taamatut kinguaassiuutitigut kanngutsaaliorfigineqartoq inuunermi sinnerani tarnikkut toqqisisimanginnermik tunineqartarpooq taamaalillunilu inuunerata sinnera artornartumik inuuneqarfiusinnaalluni.

Taamaattumik isumaqarpunga sakkortuumik pineqaatissiinissaq tessani pingaaruteqartoq, kisiannili taassumap nalaani inuk taamatut pinnissimasoq pingitsoornani aamma katsorsarneqartariaqartoq.

Nalunngilarput aamma ilisimasallit oqaatigiuarpaat taamatut inunnik innarliisartut kinguaassiuutitigut innarliisartut katsorsarneqanngikkunik amerlasoorujussuit kingumut taamatut ilioqqinnissaat qanittuararsuusoq, taanna ilisimaneqarpoq aamma ilumoortortaqarpoq taanna takusinnaavarput eqqarsaatigissagaanni pineqaatissinneqarsimasut uteqattaalertarsimagaangata.

Kisiat tassa naggataatigut ataatsimiitsitaliamut ingerlanissa eqqarsaatigalugu qujassutigaara Inatsisartut amerlanerpaat akuerimmassuk aammalu Naalakkersuisut.

Josef Motzfeldt, Inatsisartut Siulittaasuat (IA)

Qujanaq.

Allassimagaluarpoq apeqquteqartussaq imaluunniit oqaaseqartussaq tullinnguuttoq Olga Poulsen Berthelsen-iugaluartoq, kisianni taanna elektronik-imik atortut kukkunerivaa.

Paasinarsereerpoq sinneruttut, oqaaluserisassat sinneruttut sisamat tamakkersinnaanngikkigut arfinernut kipisarnissaq eqqarsaatigalugu, taamaammat sinneruttuni sisamaasuni allanguuteqartitsilaartariaqarpunga tulleriaarinermi.

Immikkoortut aqqaneq aappaat - immikkoortoq 12: Inatsisartut Ombudsmandiat pillugu Inatsisartut inatsisaat.

Taanna pingasoriagassaammat una oqaluuserineqartoq immikkoortoq 35 naammasseriarpat taanna tullinnguullugu oqaaluuserisariaqaratsigu inatsisissaammat.

Oqaaseqarumavoq inatsisartuni ilaasortaq Kim Kielsen, Siumut.

Kim Kielsen (S)

Siulittaasoq qujanaq.

“Pakatsilaanngitsuunngilanga Siumut siorngatigut taamatut tapersersuisarmat” siunnersuuteqartoq oqarpoq.

Uanga oqarsinnaavunga Siumuminngaanniit isumarput suli allanngornikuunngilaq, tamakkuninnga suliaqarnissatsinnut tunngatillugu, akuersaarsinnaanngilarput inuit taamatut kanngutsaatsuliortumik meeqqanik inersimasunulluunniit arlaannik atornerluisartut kinguaassiutitigut, akuersaarsinnaanngilarput ulloq manna tikillugu aamma siunissami taamaalinavianngilagut.

Taamaattorli eqqaamaqqarput uani uagut politikikkut oqaaseqartukkut saqqummiussaa ataatsimiitsitaliarsuup suliaasa ilaat aamma tassani qiviarnikuuaat pineqaatissiisarnermut tunngatillugu sammisat assigisaallu.

Aammali massakkut inatsimmi periarfioereerpoq annertuumik pineqaatissiissalluni, tassa imaappoq killeqanngitsumik isertitsivimmut arlaannut isertitsisoqarsinnaavoq.

Pingitsaaliinerit, pinngitsaaliisarnerit assigisaallu taakkua massakkut oqaatsit uani sammivagut, taamaattoq aamma suli aamma annertuumik innarliisartut annersaallutik tessani soorunami taakkua aamma arlaatigut sukateriffingineqarnissaat taanna ataatsimiitsitaliarsuup aamma innersuussutigivaa.

Uani oqarusuppunga Inuit Ataqatigiit oqaaseqartartuannut Kaali Olsen-i oqariartuutanut tunngatillugu aamma, isumaqataalluinnaqqissaarpunga pinerluffigineqartut taakkua aamma annertuumik iliuuseqarfingineqartariaqarput, ullutsinni massakkut immersugassannguamik tunineqartarput annertunerungaartumik suneqarnatik tassa ingerlatiinnarneqartarlutik, taamaammat arlaatigut iliuuseqarfingineqarnissaat annertuumik tessani aamma ataatsimiititaliat taakkua suliaqalerpata taakkua annertuumik aamma ujartuiffigisariaqaraat kaammattorusuppakka.
Qujanaq.

Josef Motzfeldt, Inatsisartut Siulittaasuat (IA)

Oqaaseqartoq.

Olga Poulsen Berthelsen (IA)

Una erseqqissaatigissavara pakatsininni uanga nammineq soorunami taanna pigivara, oqanngilanga Siumut taamatut oqarninni, oqanngilanga Siumup pissutsit imak ittut akuersalersimagai, taanna erseqqissaatigerusuppara.

Taavalu ukua pinerluffigineqarsimasut eqqarsaatigalugit ilumoorpoq uani eqqarsaammi pineqarluinnarmata aamma pinerlineqarsimasut taamatut pinerluffigineqarsimasut aamma Inuit Ataqatigiit oqariartuutiminni oqariartuutigivaat taassumap qanoq pingaaruteqartiginera aammalu massakkut ukioq kingulleq siunnersuutaasimasoq eqqarsaatigissagaanni Naalakkersuisut sulissutigisaannut ilaatigut aallartinneqarpoq taamatut sullisisinnaanissamut periarfissiuussineq, taamaattumik taanna ingerlavoq aamma isumaqarpunga Inatsisartuni taanna ukioq kingulleq tamatta peqataaffiginikuugippu.

Josef Motzfeldt, Inatsisartut Siulittaasuat (IA)

Qujanaq.

Inatsisartuni ilaasortaq Kaali Olsen, Inuit Ataqatigiit.

Kaali Olsen (IA)

Tassa naatsunnguaminguna.

Siunnersummut qujajumallunga taavalu isumaqarlunga Naalakkersuinikkut suliaqartut nunami siuttuusariaqartut oqartuaannarlutik akuerinagu kinguaassiuutitigut innarliisardeq, isumaqarpunga periarfissat tamaasa atortassagigut taanna isuma siaruaterniarsaralugu.

Unaana oqaatiginiaannarlugu nikuikkaluartunga, tassa ataatsimiititaliamut inatsisink atuutsitsinermut ataatsimiititaliamut innersuuppaat Naalakkersuisut tamanna aamma Inuit Ataqatigiinninggaanniit taperserparput.

Josef Motzfeldt, Inatsisartut Siulittaasuat (IA)

Oqaaseqartussat tamaanga killeqarput.

Naggasiillunilu oqaaseqassooq Naalakkersuisut Siulittaasuat.

Kuupik Kleist, Naalakkersuisut Siulittaasuat (IA)

Tassa kingullermik oqaaseqartup Kaali Olsen-ip kajummissaarutai isumaqarpunga pingaaruteqartorujussuusut taamaattumik naggataarutaasumik oqaaseqarnimni oqaatsit taakkua nangeqqikkusuinnarpakka, tassa isumaqarpunga pingaaruteqarluinnartoq periarfissat tamaasa atorlugit Naalakkersuinikkut suliallit aamma allat imaluunniit tamatta taamatut Nunatsinna atornerluinermik annertutigisumik pisoqartarnera akuersaarnatigu ersersittassagippuk oqaatigisassagippuk aammalu tamatigut sumiluunniit taamatut isumaqarnerput erseqqissumik oqaatigisassagippuk.

Inuiaqatigiinni akisussaaqatigiittutut inissisimanitsinni ajornartorsiut taamak ilungersunartigisoq eqqarsaatigalugu aammalu ukiuni arlalissuarni atugarisimallutigu massakkut inatsisitigut iliuuseqarsinnaaneq imaluunniit nakorsaatitigut iliuuseqarsinnaaneq imaluunniit allatigut tarnikkut anersaakkullu katsorsaanermik iliuuseqarsinnaaneq pigaluarlutigu pingarnerpaarpaatut suli

Naalakkersuisuniit isigiuarpaput inuiaqatigiittut akisuusaaqatigiinnita pingarnerpaatut sakkugineqarnissaa.

Taamaattumik pillaaneq kisimi aqqutissaanngitsoq periarfissaq manna iluatsillugu oqaatigerusuppara aamma sorpassuartigut allatigut ajornartorsiutit ilungersunartup pinaveersimatinnissaa aammalu pereersimagaangat katsorsaaniartarnissaq sakkut assiginngitsut sakkugalugit Naalakkersuisunut pingaaruteqartupilorusuuvooq.

Tassa jannuarip aallaqqaataaninggaanniit eqqartuussiveqarnikkut annertunerusumik pisussaaffeqalertussaavugut Nunatsinni, kisianni aamma Danmarkimi Folketingip oqartussaassuseqarnera suli atassooq taamaattumik Danskit Naalakkersuisuisa iliuuseqarniarnerni assiginngitsunut tunngasuni isumaqatigiinniarfigineqartarnissaat taanna suli sanequnneqarsinnaanngilaq aamma oqallinnermi suleqatigiissitat eqqartuussiveqarneq pillugu ataatsimiititaliarsuup sulinerata kingorna suliersinneqarsimasut eqqarsaatigalugit, suliaat soorunalimi tikkuussisussaapput qanoq ingerlaqqeriarnissatsinnut.

Kisianni Naalakkersuisuni uunga siunnersummut akuersaarnitsinni pissutigerpiarpaput eqqartuussiveqarnikkuinnaq manna suliassatut isiginnginnatsigu, kisiannili aamma tamatuma avataatigut allatigut suliaqartoqartariaqarnera eqqumaffigigatsigu.

Taamaattumik upernaamut isumasioqatigiissitsiniarnitsinni isuma neriuppunga soorunalimi ilassilluarneqassasoq, isumasioqatigiissitsineq tamanna suleqatigiissitat suliaat aammalu Inatsisartuinngaanniit isummersorneq ataatsimoortillugit nutaamik ikaarsaariarnitsinni Nunatsinni ajornartorsiutit annertuut qanoq saassuteriarnissaannut alloriarnissarput pilerinartupilussuuvooq aamma soorunalimi neriunarpooq taamatut annertunerusumik eqqumaffiginnilernikkut ajornartorsiutit annikillisarneqarnissaat periarfissaalissasoq.

Kingullertut oqaatigerusuinnarpara Demokraatit oqaaseqartuata eqqaasitsissutigisai aamma pingaaruteqartut tassalu inuiaqatigiinni demokratii naapertorlugu ingerlatsiffiusuni pissaanerup pingasoqiusamik agguarneqarsimaneranut ataqqinnittariaqarnerput.

Soorunalimi aamma imak ittunik ajornartorsiutinik taamaattunik eqqartuinitssinni pingaaruteqaqaaq pissaanerup agguarneqarsimanerata ataqqineqarnissaanut eqqaasitsineq, tassami uagut

inatsisiliortuuvugut uanilu inatsisiliortuunngilagulluunniit immaqa, immaqa taamatut oqarsinnaavugut aamma Folketingi suli suleqatigisariaqaratsigu, kisianni inatsisiliortut tassaanngimmata unnerluussisut aamma inatsisiliortut tassaanngimmata eqqartuussisut. Qujanaq.

Josef Motzfeldt, Inatsisartut Siulittaasuat (IA)

Qujanaq.

Qutsavigaarpus Naalakkersuisut Siulittaasuat.

Taamaalilluni oqaluuserisassaq pineqartoq, tassalu immikkoortoq 35
aappassaaneerneqannginermini Inatsisit Atortinneqarneranut Ataatsimiitaliami suliarineqassooq
aappassaaneerneqarumaarporlu ullumi tusaamasanngortuni 27-ian i oqaaluuserisassarpasuit
qularnanngilaq allat ilanngullugit tassani oqaluuseriumaarpagut.

Massakkullu nalunaarutigeriikkattut oqaluuserisassaq tulliuttoq tassaavoq inatsisisaq Inatsisartut Ombudsmandiat pillugu Inatsisartut inatsisaat nr. xx, uu. qqqq 20xx-meersoq.